



مریضان دے ریکارڈز تیکر آن لائن رسائی دے بارے وچ اہم جانکاری

NHS لوکاں نوں اپنی ذاتی صحت دی جانکاری دا آن لائن مشاہدہ کرن لئی بہتر طریقے فراہم کرنا چاہندا اے۔ اسی جاندے اں کہ لوکی اپنے صحت دے ریکارڈز تیکر رسائی حاصل کرن دے قابل ہونا چاہندے نیں۔ ایدے نال تہانوں ٹیسٹ دے نتیجیاں دا مشاہدہ بہت چھیتی نال کرن وچ مدد مل سگدی اے۔ ایدے علاوہ ایہہ تہانوں تہاڈی سہولت دے مطابق اپائنٹمنٹس نوں پڑھن اتے اوہناں دا جائزہ لین دی اجازت دیندا اے۔

16 سال توں ودھ عمر آلے کجھ مریض ہن NHS ایپ، ویب سائٹ یا ہور قابل رسائی محفوظ ریکارڈز دی حامل ایپ راہیں اپنے آن لائن اکاؤنٹ تے اپنے ڈاکٹر (GP) ولوں فراہم کیتی نویں جانکاری دا مشاہدہ کر سگدے نیں۔ ایس جانکاری وچ تہاڈے اپائنٹمنٹ دے نوٹس دے نال ٹیسٹ دے نتیجے اتے خط وی شامل ہو سگدے نیں۔

ہو سگدا اے کہ کدی کدار تسی ایس جانکاری نوں ویکھن توں قاصر ہوو؛ ایدا انحصار تہاڈی پریکٹس پالیسیز اتے حفاظتی سسٹمز تے ہووے گا۔ ایدے توں علاوہ، ریکارڈز تیکر رسائی فراہم کرن توں پہلاں، ہو سگدا اے تہاڈا ڈاکٹر تہاڈے نال گل بات کرنا چاہے، مثال دے طور تے ٹیسٹ دے نتیجیاں دے بارے وچ یا ایس گل نوں پک کرن لئی کہ رسائی تہاڈے لئی فیدے مند ہووے کیوں جے تہاڈے ریکارڈز وچ حساس جانکاری ہو سگدی اے۔ اوہ اوہناں مریضاں نال گل بات وی کرنا چاہ سگدے نیں جیہڑے اپنے ریکارڈز تیکر رسائی حاصل کرن دے بارے وچ فیصلہ کرن لئی معاونت توں فیدہ چک سگدے نیں۔ جے تہاڈے کوئی خدشے ہوں یا تہانوں معاونت یا ہور جانکاری دی لوڑ ہووے، تے میربانی کر کے پریکٹس دے عملے یا اپنے ڈاکٹر نال گل کرو۔

ایناں تبدیلیاں دا اطلاق بس اوہناں لوکاں تے ہوندا اے جہاں دے آن لائن اکاؤنٹس نیں۔ جے تہانوں آن لائن اکاؤنٹ دی لوڑ نہیں اے، تے تسی فیر وی استقبالیہ تے ایس جانکاری دی درخواست کر کے اپنے صحت دے ریکارڈز تیکر رسائی حاصل کر سگدے او۔ تبدیلیاں دا اطلاق وی بس تہاڈے بارے وچ ذاتی جانکاری تے ہووے گا۔ جے تسی نگہداشت کار او اتے کسے انج دے فرد دے بارے وچ جانکاری دا مشاہدہ کرنا چاہندے او جیہڑا تہاڈی نگہداشت وچ اے، تے استقبالیہ دے عملے نال گل کرو۔

ایہہ بوہتا اہم اے کہ تسی اپنی NHS ایپ، ویب سائٹ یا ہور آن لائن سروسز دیاں لاگ ان تفصیلاں نوں محفوظ رکھو۔ کسے دے نال وی اپنے پاس ورڈ دا اشتراک نہ کرو کیوں جے ایدے بعد اوہناں نوں تہاڈی ذاتی جانکاری تیکر رسائی حاصل ہو جاوے گی۔ تہانوں ایہہ وی پک کرنا چاہیدا اے کہ جیویں ای تسی اپنے ریکارڈز دا جائزہ مکمل کر لوو تے چھیتی توں چھیتی لاگ آف کر دوو، کیوں جے کجھ ایپس خودکار طور تے ایہہ نہیں کر سگدیاں۔

جے تسی اپنی صحت دے ریکارڈز دا مشاہدہ نہیں کرنا چاہندے، یا تہانوں ایناں تبدیلیاں دے بارے وچ ہور جانکاری دی لوڑ اے، تے میربانی کر کے اپنے ڈاکٹر یا پریکٹس دے عملے نال گل کرو۔